



楊氏
司
堂

華陽國志卷第十上

先賢士女總讚

晉江原常璩撰

明銅澤張生胤校刻

舍和誕氣人倫資生必有賢彥為人經紀宣德達教
博化篤俗故太上立德其次立功其次立言品物煥
炳彛倫攸敘也益梁爰在前代則夏勲配天而彭祖
體地及至周世朝服將命蔓子忠堅然顯者猶鮮豈
國史簡闕亦將分以秦楚希預華同自漢興以來迄
乎魏晉多士克生髦俊蓋世愷元之疇感于帝思於
是璽書文馳於斜谷之南束帛戔戔于梁益之鄉或
迺龍飛閣允陟璿璣亦有盤桓利居經綸皓素其

華陽國志卷十一
軼懷道術服膺六藝弓車之招旃旌之命徵名聘德
忠臣孝子烈士賢女高劭足以振玄風貞淑可以方
蘋蘩者奕世載美是以四方述作來世志士莫不仰
高軌以咨詠憲洪猷而儀則擅名八區為世師表矣
故者舊之篇較義史漢而今志州部區別殊可總而
言之用敢撰約其善為之述讚因自註解甄其洪伐
尋事釋義略可以知其前言徃行矣

逸民嚴遵君平

嚴平恬泊皓然沉冥

治中從事李弘仲元

仲元抑抑邦家儀形

給事黃門侍郎楊雄子雲

子雲玄遠煥乎弘聖

逸民林閭公孺

林生清寂莫得而名

執政大中司空汎鄉侯何武君公

汎鄉忠貞社稷是經進賢為國稽攻典刑愛莫

助之身殞朝傾

侍中揚州刺史張寬叔父

叔父播教變風為雅道洽化遷我寔西魯

中郎將司馬相如長卿

長卿彬彬文為世矩

諫議大夫王褒子淵

王淵豔麗蔚若華圃

校書郎中楊終子山

子山翰藻遺篇有厚

左衛護軍陳立少遷

少遷猛毅垂勳三邦

益州太守王阜世公

世公試政祥瑞來同

侍中漢五更張霸伯饒謚文父

猗歟文父督發幼童德瞻會稽道崇辟雍

國師太常趙典仲經

少府委遲作卿作師

僕射何英叔俊 高士楊由哀侯

何汶景由

英侯

尚書令司隸校尉大司農任昉文始

司農明允國憲是維

中郎將何霸翁君

翁君美秀牧後寤機

美陽令柳宗伯騫

伯騫推賢求善如饑

太尉司徒司空特進厨亭文侯趙戒志伯

文侯顛卬極位台衡

太尉郾惠侯趙謙彥信

太尉頡頏志振頹綱

司徒趙溫子柔

司徒繼踵儷俛權橫猶操道柄董李是讓

侍中長水校尉常洽茂尼

侍中授命分節亦章

從事楊竦子恭

蠻夷猶擾倡亂南疆子恭要傳醜穢于攘

治中從事張充伯春 司空辟士李幾孟元

伯春孟元匡正時君

閬中令楊班仲桓 廣漢長羅衡仲伯

楊羅為小遺愛在民

廣漢太守陳湛小伯

小伯溫恭預圖息紛

孝廉禽堅孟由

孟由至孝遐葉晞風

節士仲昱 志士任末叔本 功曹史朱普伯禽

主簿李磬文寺

仲昱勉師叔本慕仁伯禽證將文寺代君炎光

中微巨述僭辭王莽字巨君 述即公孫

太中大夫章明公孺 美陽令王皓子離

尚書郎侯剛宣孟 尚書郎王嘉公卿

章王刎首侯剛哭漢公卿絕脰亦蹈節貫

博士羅衍伯紀

羅生美至思濟艱難述方遂非殘彼貞幹

大鴻臚何宗彥英

劉王割據資我英俊鴻臚淵通與道推運

鍵為太守何祗君肅

君肅矯矯穎類倬群

輔漢將軍張裔君嗣

輔漢朗捷服時之懃

太常杜瓊伯瑜

太常清慎密邃遠深

休休衆彥殊塗同臻金聲玉振蜀之球琳休休美也

衆彥言此四十三人也易曰殊塗同歸百行者雖立行不同垂美如

金玉之音器為世名寶 以上士人

張霸夫人司馬敬司

敬司穆暢始玄終

王遵妻張叔紀霸女

叔紀婉婉十媛仰風

公乘會婦張氏

公乘張氏兩髦義崇

楊鳳珪妻助陳

助陳撫孩節篤分克

便敬賓婦常元常

殷仲孫妻常靡常

二常熒熒頽構再

趙侯夫人常紀常

紀常哀哀精感昭融

景竒妻貢羅

趙憲妻玆何

貢羅誓志玆何忘生

朱叔賢妻張昭儀

姚超二女姚妣饒

昭儀殉身二姚見靈峩峩淑媛表圖銘旌

淑善媛婉

婉也言此十二女皆圖像列傳

以上士女

右蜀郡士女讚第一凡五十五人

四十三人女

佳胤按常璩三州士女目錄巴郡士女范目以下共七十八人當列蜀郡後為第二卷今按本志讚

將作大匠翟酺子超

大匠竒暢妙鑑玄察盡言世規祗以隕越

司隸校尉郭賀喬卿

司隸聰敏奮名後葉

光祿大夫侍中衛尉鐔顯子誦廬江太守蔡弓

子騫

鐔蔡翩翩交友惟賢

樂安相李元伯仁東觀郎李勝茂通

兩李釁采文藻可觀

聘士王稚叔起隱士馮信季誠

憲父懸車徵君肥遯

侍中董扶茂安聘士任安定粗

董任循志東帛箋箋

蜀郡太守王商文表

文表泛博提攜士彥

牂牁太守劉寵世信

超類拔萃寔惟世信

辟士段恭節英

節英元烈仰訴鼎臣

江陽符長姜詩士遊

士遊孝淳感物悟神

郟令王忱少林

少林陰德陽報是甄

野王令羊朞仲魚 治中從事朱倉雲卿

仲魚謙冲雲卿安貧

高士折像伯式 義士杜貞孟宗

伯式玄照孟宗當仁味道好施清風邁倫

讚仲魚以下

五官掾諒輔漢儒

漢儒請雨精感慶雲

綿竹主簿韓揆伯彥 壯童左喬雲 義士楊寬

叔仲

韓揆義烈喬雲勇震楊寬證將烈播友人

節士甯叔茂泰 義士張鉗子安

甯叔執仇張復師讎

烈士賈初元集

賈為士死分伴虞朱

太醫丞校尉郭玉通直

郭玉通直蓋亦所脩

大司農秦宓子勅

爰迄劉氏司農舍章爽朗翠粲觀國之光

別駕李朝永南 西曹掾李邵偉南 益州太守

王士義強 綿竹令右丞王甫國山

李王四子並作琳琅

少府太常鐔承公文

優游容與特進太常

忠烈從事王累

從事烈至諫君刎首

忠謀從事鄭度

鄭度進規忠謀莫受雖云天時抑由人咎

江陽太守彭羨永年

永年負才自喪世主

權為太守李邈漢南

漢南哽哽天奪其守

誅誅彥造或哲或友昭德音芳垂名厥後總讚四十一

六人也以上人士

任安母姚氏

任母治內子成名賢

姜詩妻龐行

龐行養姑婦師之先

司馬雅妻姜義舊

依依義舊抗疏邦庭誠感世主徙女輟刑

廖伯妻殷紀配

紀配斷指以章厥貞

王輔妻彭非 便敬妻王和 馮李宰妻李進娥

彭王進娥殘體令誠

楊文妻李正流

正流自沉水潔冰清

袁稚妻相烏 王上妻袁福

相烏袁福不義存生

汝敦妻某

汝氏世胄由婦謙柔思媚烈媛美稱惟休未二

讚十一人也以上士女

右庶漢郡士女讚第三凡五十七人四十一人女士

關內侯光祿大夫王延世長叔

王延河平纂禹之功

城門校尉五官中郎將董鈞文伯

文伯習禮繼武孫通

司空廷尉張皓叔明

張公執憲克智克聰極位青紫寔作司空

司隸校尉趙旂子鸞

子鸞司京桴鼓不鳴

尚書中郎司隸校尉楊渙孟文

孟文翹翹平顯有成

司隸校尉楊準伯邳 揚州刺史楊莽翁君

伯邳正直耀祖揚聲翁君將命迺播其名

合浦太守費貽奉君 徵士任永君業 公車令

杜撫叔和 上黨太守趙松君喬

奉君遯世任君開明和叔順終君喬密精英英

四子利於居貞讚費貽以下

廣陵太守張綱文紀

皇漢弛綱宮人失紀文紀蹇諤表明臧否

復漢將軍朱遵孝仲

白虜狂僭亂離斯圯孝仲繫馬社稷是死

新都令趙敦

建侯弔梁效志知己

尚書郎隗相叔通

叔通敦孝石生江汜

永昌太守吳順叔和

吳生致養亦感靈祉

蜀郡太守關內侯楊洪季休

劉后初載實多良才季休忠亮經事能治
五官中郎將五梁德山

德山耽學道以光時

諫議大夫費詩公舉

烈武作合度曠塗夷惜哉公舉師直凌遲

射聲校尉楊義文然

文然簡略不從詭隨

車騎將軍都亭侯張翼伯恭

車騎快快與國安危

猗猗衆偉芳烈名垂方德繹勳捷之瓊瑰

以上人士

王博妻楊進

楊進穆穆先姑是憲

楊文方妻陽姬

楊姬請父厥族蒙援克諧內愛訓及秀彥

相登妻周度

周度割體貞節是全

周紀妻曹敬姬

敬姬沉淵誠烈邈然

張惟妻程貞玦

貞玦玉操彌久彌刊

尹仲讓妻韓姜

韓姜自才後旌其寃

儀成妻謝姬

謝姬引决同穴齊定

盛道妻趙媛姜

媛姜匹婦勉夫濟子授命圉國義踰國士

張貞妻黃帛按水經注作張貞

黃帛求喪沉身中流靈精相感攜夫共浮

烈哉諸媛節稱義尊總九女以上士女

右隸為郡士女讚第四凡三十八二十九人

逸民鄭子真

鄭真岳峙確乎其清

聘士衛衡伯梁

衛梁泥盤玄湛淵亭

城陽中尉鄧先

鄧公方斷忠枉原情

博望侯張騫

博望致遠西南來庭

給事中張猛子游

子游師生讒巧所傾

逸民楊王孫

王孫養性矯葬厲生

司徒李郃孟節

司徒監使術暢思精屢登上司七政是經

太尉李固子堅

炎精不頽朱明不揚太尉寒謫仕國授荒濯日

賜谷將及扶桑惡直醜正漢道遂喪

度遼將軍張亮則元脩

元脩敦重威惠寔亮

捷為太守趙宣子雅

子雅溫恭見察文方

廣漢太守趙瑤元珪
尚書趙琰雅珪

二珪琬琰三辰懸望

弘農太守陳綱仲卿

仲卿報友行義以理

司隸校尉李法伯度

伯度玄鏡榮辱肩已

京兆尹李燮德公

德公在林懸象垂譽既冲雲清荀張儀準

巴郡太守陳雅伯臺

伯臺處諫師言亢盡末命防萌妙覩玄揆

綿竹令閻憲孟度 奉車都尉李歷季子

孟度邵允季子英瑋

計曹史程苞元道 葭萌長祝龜元靈

計君經筭元靈斐斐

主簿段崇禮高 功曹程信伯義

禮高殉名伯義死節

四行齊致在茲六子讚閻憲以下

從事燕邠元侯 主簿趙嵩伯高 從事陳調元

化

元侯趙陳蓋亦烈士

王宗 原展 嚴孳 李容 姜濟 陳巳 曹

庶 勾矩 劉旌以上九人無專讚傳附程信傳下

渙渙龍宗振振麟趾文炳彬蔚漢之表軌總讚三十

五人也 以上人士

陳祗妻穆姜

穆姜温仁化繼為親

楊拒妻泰瑛

泰瑛嚴明世範厥訓

杜泰姬

杜氏之教父母是遵

陳省妻楊禮珪

禮珪肅穆言存典韻

趙伯英妻李文姬

文姬教敏宗祀獲歆

曹寧妻陳順謙 張亮則妻陳惠謙

陳氏二謙或智或仁

趙嵩妻張禮脩

禮脩順姑恩愛溫潤

趙子賤妻韓樹南

樹南悼夫輕死重信

祁祁令姬如玉如金允矣淑媛齊德姜任九人

也以上士女

右漢中郡士女讚第五凡四十四人三十五人

鎮遠將軍成義侯文齊子奇

鎮遠敦壯立勲南瀕

節士李業巨遊

巨遊玉辟高風金振

益州太守景毅文堅

文堅丞哉南面懷民

孝廉楊克盛國

盛國好學研願聖真

布衣士景鸞漢伯

漢伯隸業諸生之純

功曹張壽伯僖 童人李餘

伯僖効忠李餘殘身

濟陰相寇祺宰朝 義士王晏叔博

寇王二子行勇以仁

方士李助翁君

李助多方以茲立稱

隱士李仁德賢

章武之興亦迪才倫德賢好古澹心藝文

諫議大夫杜微國輔

國輔皓然形動神沉

太子家令尹默思潛

思潛遊學休志素林

太子中庶子右中郎將李讓欽仲

欽仲朗博訓詁典墳

監軍將軍司馬李福孫德

孫德果銳作劉幹臣

衍衍偉彥王閏蘭芬劭名表器江漢之俊

總讚十五

也人以上人士

王敬伯夫人文季姜

季姜雍穆化播二婦王氏世興寔由賢母

虞顯妻杜季女

杜慈專專父不諒只

郭孟妻敬楊

敬楊雪讐壯踰烈女

惟茲三媛仁暢義理邦有此嬪以馳遐紀

總讚

也以上士女

右梓潼郡士女讚第六凡士女十八人

十五人女三人

蜀郡士女

嚴遵字君平成都人也雅性澹泊學業加妙專精大

易耽於老莊常卜筮於市假著龜以教與人子卜教

以孝與人弟卜教以悌與人臣卜教以忠於是風移

俗易上下慈和日閤得百錢則閉肆下簾授老莊著

指歸為道書之宗楊雄少師之稱其德杜陵李強為

益州刺史謂雄曰吾真得君平矣雄曰君但可見不

能屈也強以為不然至州脩禮交遵遵見之強服其

清高而不敢屈也歎曰楊子雲真知人也年九十卒
雄稱之曰不慕夷即由矣不作苟見不治苟得久幽
而不改其操雖隨和何以加諸

李弘字仲元成都人少讀五經不為章句處陋巷淬
勵金石之志威儀容止邦家師之以德行為郡功曹
一月而去子贅以見辱殺人太守曰賢者之子必不
殺人放之贅自以枉語家人弘遣亡命太守怒讓弘
弘對曰贅為殺人之賊明府私弘枉法君子不誘而
誅也石碯殺厚春秋譏之孔子稱父子相隱直在其
中弘實遣贅太守無以詰也州命從事常以公正諫

爭為志揚子雲稱之曰李仲元為人也不屈其志不
累其身不夷不惠可否之間見其貌肅如也觀其行
穆如也聞其言愀如也非正不言非正不行非正不
聽吾先師之所畏

楊雄字子雲成都人也少貧好道家無擔石之儲十
金之費晏如也好學不為章句初慕司馬相如綺麗
之文多作詞賦車騎將軍王音成帝叔舅也召為門
下史薦待詔上甘泉羽獵賦遷侍郎給事黃門雄既
升秘閣以為詞賦可尚則賈誼升堂相如入室武帝
讀大人賦飄飄然有凌雲之志不足以諷諫乃輟其

業以經莫大於易故則而作太玄傳莫大於論語故
作法言史莫善於蒼頡故作訓纂箴諫莫美於虞箴
故作州箴賦莫弘於離騷故反屈原而廣之典莫正
於爾雅故作方言初與劉歆王莽董賢同官並至三
公雄歷三帝猶不易官年七十一卒自劉向父子桓
譚等深敬服之其玄源淵懿後世大儒張衡崔子玉
宋仲子王子雍皆為注解吳郡陸公紀尤善於玄稱
雄聖人雄子神童烏七歲預雄玄文九歲卒
林閭字公孺臨邛人也善古學古者天子有輜車之
使漢興以來而劉向之徒但聞其官不詳其職惟閭

與嚴君平知之曰此使考八方之風雅通九州之異
同主海內之音韻使人主居高堂知天下風俗也楊
雄聞而師之因此作方言閭隱遯世莫聞也

何武字君公郫人也初以對策甲科為郎歷楊交州
刺史司隸校尉京兆尹清河楚沛太守廷尉御史大
夫成帝初具三公拜大司空封泛鄉侯為人忠厚公
正推賢進士在楚致兩龔在沛厚兩唐臨司隸致茂
陵何並居公位進辛慶忌皆世名賢臨州郡雖無赫
赫之名及去民思之才雖不及丞相薛宣翟方進而
正直過之哀帝即位以朱博趙玄為公卿用事免官

諫大夫鮑子都亟言訟之丞相王嘉亦以為慨帝復徵武為御史大夫徙前將軍時大司馬新都侯王莽避帝外家丁傳氏遜位亦以列侯見徵哀帝詔博舉太常莽從武求舉武以莽奸人之雄不許哀帝崩王太皇太后莽姑也即日引莽入收大司馬董賢印綬詔舉大司馬丞相孔光等逼王氏皆舉莽武與左將軍公孫祿謀曰莽五父世朝權傾人主必危劉氏乃舉祿祿亦舉武太后不從用莽為大司馬莽諷有司劾奏皆免武就國後莽寢盛遂為宰衡安漢公欲圖篡漢憚武與其叔紅陽侯王立不從元始三年因呂

寬吳章事檻車徵武武自殺衆咸寬之莽欲厭衆心謚武曰刺侯子况嗣平帝崩莽因居攝後僭王位張寬字叔文成都人也蜀承秦後質文刻野太守文翁遣寬詣博士東受七經還以教授於是蜀學比於齊魯巴漢亦化之景帝嘉之命天下郡國皆立文學由翁唱其教蜀為之始也寬從武帝郊甘泉秦時過橋見一女子裸浴川中乳長七尺曰知我者帝後七車適得寬車對曰天有星主祠祀不齊潔則作女令見帝感寤以為楊州刺史復別地莽之妖世稱云七車張作春秋章句十五萬言

司馬相如字長卿成都人也遊京師善屬文著子虛賦而不自名武帝見而善之曰吾獨不與此人同世揚得意對曰臣邑子司馬相如所作也召見相如相如又作上林賦帝悅以為郎又上大人賦以風諫制封禪書為漢辭宗官至中郎將世之作辭賦者自揚雄之徒咸則之

王褒字子淵資中人也以高才文藻侍宣帝初為王襄作樂職中和頌宣帝時又上甘泉洞簫賦帝善之令宮人誦之為諫大夫卒

揚終字子山成都人也年十三已能作雷賦通賦七諫章後坐太守徙邊作孤憤詩明帝時與班固賈逵並為校書郎剛太史公書為十餘萬言作生民詩又上符瑞詩十五章制封禪書著外傳十二卷章句十五萬言皆傳於世

陳立字少遷臨邛人也成帝時牂牁有亂將軍王鳳薦立為太守克平禍亂徙守巴郡秩中二千石治行尤異又徙天水太守為天下最天子賜黃金四十斤入為左衛護軍

王阜字世公成都人也太守第五倫察舉孝廉為重泉令有鸞鳥集于文學十餘日遷益州太守神鳥出

滇池河甘露降白鳥見民懷之如父母

張霸字伯饒謚曰文父成都人也年數歲以知禮義

諸生孫林劉固段著等宗之移家其字下啓母求就

師學母憐其稚對曰饒能漢傳云我故字伯饒也為

會稽太守撥亂興治立文學學徒以千數風教大行

道路但聞誦聲百姓歌詠之致達名士顧奉公孫松

畢海胡毋官萬虞先王演李根皆至大位在郡十年

以有道徵拜議郎遷侍中遂授霸五更尊禮於文學

年老卒葬河南梁縣按後漢書霸子指

趙典字仲經成都人也太尉戒孫也與潁川李膺等

並號八俊三為侍中自樂祿俸施貧方授國師未拜

病卒按東漢本傳典為戒子

何英字叔俊邠人也謝承書典為戒叔子楊由字哀侯成都人也二子

學通經緯英著漢德春秋十五卷孫汶字景由亦深

學初徵上日食盜賊起有劾為謁者京師早請雨即

澍遷犍為屬國著世務論三十篇卒楊由為太守廉

范文學范稱能治由言當有賊發頃之廣柔羗反寇

殺長姚超鄉人冷豐齎酒候之值客未內由為知其

多少又言人當致菓其色赤黃果有送柑橘者大將

軍竇憲從太守索雲氣圖由諫莫與尋憲受誅其明

如此著書十篇而卒

任昉字文始成都人也初為葉令治奸賊七十餘人遷梁相尚書令清身檢下大將軍梁翼憚之出為魏郡徙平原歲出租稅百萬冀誅復入為尚書令司隸校尉遷大司農卒弟愷徐州刺史亦有治名昉父循字伯度為長沙太守得其父時為五官事在精通也何霸字翁君司空武兄也為郡戶曹刺史王尊將之官移諸郡不得遣迎太守唯霸曰宜往太守遣霸尊大怒霸對曰太守遣霸非脩敬也以去京師久遲知朝廷起居耳尊遽下車持節對之因竒霸容止辟為

別駕舉秀才為屬國中郎將弟顯為潁川太守兄弟五人皆有名

柳宗字伯騫成都人也初結九友共學號九子及為州郡右職務在進賢拔致求次方張叔遼王仲曾殷智孫等終至牧守州里為諺曰得黃金一笥不如為伯騫所議舉茂才為陽夏太守

文侯趙戒字志伯少府典祖也父定以遊俠稱成順桓帝之世歷司徒太尉登特進屢居公輔免憂患于無妄之世告歸于蜀薨家

趙謙字彥信戒孫也歷位卿尹初平元年為太尉時

董卓秉政欲遷天子長安譙與司空荀爽固諫卓不聽以為車騎將軍奉大駕西幸封洛亭侯拜司隸校尉忤卓指免討白波賊有功封侯進司徒免拜尚書令太僕三年薨謚曰忠侯

趙溫字子柔一弟以侍中與同輦西遷封江南亭侯兄亡初平四年拜司空未甚進司徒當世榮之時車騎將軍李傕與董卓承張濟等爭權數遷移天子溫以書劫責於傕天子聞為寒心尋曹公入從天子都許政出諸侯禮待溫居公位十五年建安十三年薨董卓李傕凶擅譙溫平之初文侯與李固胡廣之立清

河王蒜而冀欲立蠡吾趙戒脇而從之使李固枉死君子以為卓傕之惡甚於梁冀譙摩卓之牙溫弄傕之爪雖逼權勢以道陳訓賢其祖遠矣

常洽字茂尼江原人也自荊州刺史遷京兆尹侍中長水校尉以兵衛大駕西幸傕等作難常侍衛守左右為傕所殺

楊竦字子恭成都人也永初中越雋永昌夷反殘破郡縣衆十萬餘刺史張喬以竦勇猛授從事任平南中竦先以詔書告喻不服乃加誅殺虜三萬餘人獲生口千五百人財物四千萬降夷三十六種舉正奸

濁長吏九十人黃綬六十人南中清平會被傷卒喬
舉州弔贈列畫東觀

張克字伯春一李幾字孟元江原人也充為治中從
事時刺史恃豪每見從事布席地坐已自安高床上
克入閣不肯進刺史寤乃更禮從事刺史辟公孫特
大姓犍為李威橋稚克曹闕時有水災倫受刺史出
以漢中斗平不足表聞幾固爭之後刺史至與倫不
平求郡短幼倫不言水災幾對以詔書上災異不
由州倫遷司空辟幾掾

楊班字仲桓成都人也一羅衡字仲伯郫縣人也

師徵士何初山班為不韋茂陵令治化浹洽徙西城
閬中令號時名宰衡為萬年令路不拾遺人家牛馬
皆繫道邊曰屬羅公三府爭辟拜廣漢長二縣皆為
立祠

陳湛字小伯成都人也歷數縣令民皆懷之州辟治
中從事廣漢太守遣子詣州脩歡交使君欲納湛諫
不可失羔羊義使君從之後有言州郡私交者考之
無得乃明也

禽堅字孟由成都人也父信為縣史越嶲為夷所得
傳賣歷十一種去時堅方姪六月生母更嫁堅壯乃

知父湮沒鬻力傭賃求碧珠以求父一至漢中三出
徼外周旋萬里經六年四月突瘴毒狼虎乃至夷中
得父父相見悲感夷徼哀之即將父歸迎母致養州
郡嘉其孝召功曹辟從事列上東觀太守王商追贈
孝廉令李苾為立碑銘迄祠之

仲昱成都人也少受學於嚴季后季后為汶江尉書
呼仲昱仲昱許十月往會夷反斷道仲昱期於往經
渡六千幾死數年卒得至汶江為李后陳榮俱得免
難遠近歡之

任末字叔本繁人也與董奉德俱學京師奉德病死

推鹿車載其喪師亡身病齋棺赴之道死遺令勅子

或喪至師門叙平生之志也按本傳末子名造

朱普字伯禽廣都人也為郡功曹太守與刺史王董

有隙枉見劾普詣新都獄掠笞連月臙肉腐臭同日
死以證太守無事勅其子曰我死載喪詣闕使天子
知我心事得情理普以烈聞

李磬字文寺嚴道人也為長章表主簿旄牛夷叛入
攻縣表倉卒走鋒刃交至磬傾身捍表謂虜曰乞殺
我活我君虜乃殺之表得免太守嘉之圖像府庭
義敦終始可稱人生於三事若一君父師也言人靡

不有初鮮克有終普磬可謂能終始也自高祖至平
帝十二世國嗣三絕平帝早崩安漢公王莽字巨君
遂篡天子位稱新室皇帝而茂陵公孫述字子陽為
莽導江卒正遂僭號于蜀

章明字公孺新繁人也卜王皓字子離江原人也明
為太中大夫莽篡位歡曰不以身事二主遂自殺
皓為美陽令去莽歸蜀公孫僭號使使聘之皓乃自
刎以頭付使者述慙怒誅其妻子

剛字宣孟新繁人也為郎見莽篡位佯狂負木斗守
闕號哭莽使人問之對曰漢祚無窮吾寧死之不忍
事非主也莽追殺之

王嘉字公卿江原人為郎去莽還蜀公孫述先閉其
妻子使人徵之嘉聞王皓死歡曰吾後之哉亦自殺
述慙誅其妻子

羅衍字伯紀成都人也為述郎說述尚書解文卿鄭
文伯使諫述降漢為子孫福解鄭從之述怒閉二子
於薄室六年二子守志不回遂幽死卒衍察孝廉徵
博士

何宗字彥英郫縣人也通經緯天官推步圖讖知劉
備應漢九世之運讚立先主為大鴻臚方授公輔會

卒

何祗字君肅宗族人也初捷為楊洪為太守李嚴功曹去郡數年以為蜀郡嚴在官祗為洪門下書佐去郡數年以為廣漢洪猶在官是以西土咸服諸葛亮之能攬拔秀異也祗徙捷為太守卒

張裔字君嗣成都人也汝南文休稱其才鍾元常輩也為輔漢將軍丞相長史丞相北征居府統事足食足兵

杜瓊字伯瑜成都人也師事任安粗通經緯術藝為太常沉默慎密稱諸生之淳

敬司馬氏女五更張伯饒妻也霸前妻有三男一女敬司產一男撫教五子恩愛若一霸卒葬河南敬司與諸子還蜀疾病遺令告諸子曰舜葬蒼梧二妃不從汝父在梁吾自在蜀亦各其至勿違吾勅也遂葬蜀子光超稟母教為聘士也

叔紀霸女孫也適廣漢王尊至有賢訓姑以禮生子商海內名士廣漢周幹古朴彭懿漢中祝龜為作頌曰小則為家之孝女長則為家之賢婦老則為子之慈親終溫且惠秉心塞淵宜謚曰化明惠母

公乘會妻廣都張氏女也夫早亡無子姑及兄弟欲

改嫁之張誓不許而言之不止乃斷髮割耳養會族子事終身

助陳臨邛陳氏女犍為楊鳳珪妻也鳳珪亡養遺生子守節兄弟必欲改嫁乃引刀割咽宗族駭之幾死遂全其義

元常靡常江原人元常廣都令常良女適廣漢便敬賓早亡元常無子養賓族子父母欲嫁乃祝刀誓志而死靡常仲山女適成都殷仲孫家遭疫氣死亡惟靡常在十八收葬諸喪養遺生子立美成家

紀常常侍常洽女趙候夫人也父遇害在長安一兄

皆先沒遣父門生瞿登張順迎喪時寇賊蜂起晝夜悲哀順登得將喪無恙還時人皆以紀常精誠所感貢羅耶羅倩女景竒妻也竒早亡無子父愍其年壯以許同郡何詩貢羅白書誓父不還家父使詩乃白州州告縣逼遣之羅乃訴州刺史高而許之

玟何耶何氏女成都趙憲妻也憲早亡無子父母欲改嫁何恚憤自幽乃不食旬日而死郡縣為立石表昭儀新繁張氏女廣漢朱叔賢妻也賢為郡督郵建安十九年劉主圍劉璋於成都賢坐謀外降璋以昭儀配兵將見逼昭儀自殺三軍莫不哀歎

廣柔長郟姚超二女姚妣饒未許嫁隨父在官值九種夷反殺超獲二女欲牧羊二女誓不辱乃以衣連腰自沉水中死見夢告兄慰曰姊妹之喪當以某日至漑下慰寤哀愕如夢日得喪郡縣圖像府廷

華陽國志卷第十上

華陽國志卷第十中

廣漢士女

楊宣字君緯什邡人也少受學於楚國王子張天文圖緯於河內鄭子侯師事楊翁叔能暢鳥言長於災異教授弟子以百數成帝徵拜諫大夫帝無嗣宣上封事勸宜以定陶恭王子為太子帝從之出宣為交州牧太子即位為哀帝拜河內太守徵太倉令上宜封周公孔子後帝從之封周公孫相如為褒魯侯孔子後孔均為褒成侯又薦遼東王綱瑯琊徐吉太原郭越楚國龔勝等宜讚隆時雍平帝時命持節為講

學大夫與劉歆共校書居攝中卒門生河南李吉廣漢嚴象趙翹等皆作大儒

鄭純字長伯鄴人也為益州西部都尉處地金銀琥珀犀象翠羽出作此官者皆富及十世純獨清廉毫毛不犯夷漢歌歎表聞三司及京師貴重多薦美之明帝嘉之乃改西部為永昌郡以純為太守在官十年卒列畫頌東觀

楊統字仲通新都人也事華里先生炎高高戒統曰漢九世王出圖書與卿適應之建武初天下求通內識二卷者不得永平中刺史張志舉統方正司徒魯

恭辟掾與恭共定音律上家法章句及二卷解說侍中光祿大夫以年老道深養於辟雍授几杖為三老卒

王祐字平仲鄴人也少與雒高士張浮齊名不應州郡之命司隸校尉陳紀山名知人稱祐天下之高年四十二卒第獲志其遺言撰王子五篇東觀郎李勝文章士也作誅方之顏子列畫學官獲一作崔

楊序字仲桓統仲子也道業偉父三司及公車連徵辭拜侍中上言四方反荆揚交州當兵起人民疫蝗洛陽大水宮殿當災三府當免近戚謀變皆効驗大

將軍梁冀秉權自退去授門徒三千人本初元年及建和中特徵聘不行年八十三卒天子痛惜詔謚曰文父弟子雒昭約節宰綿竹寇權文儀蜀郡何襄幼正侯祈升伯巴郡周舒叔布及任安董扶等皆徵聘辟舉馳名當世

段翳字元章新都人也明經術妙占未來常告太渡津口曰某日當有諸生二人荷擔問自舍處者幸為告之後竟如其言又有人從冀州來學積年自以精究翳術辭去翳為筒作書封頭與之告曰有急發之至葭萌爭津吏過從者頭諸生發筒筒中有書曰到

葭萌爭津破頭以膏裹之生乃喟然知不及翳還更精學翳常隱匿不使人知門人皆號夫子

王渙字稚子鄴人也初為河內温令路不拾遺卧不閉門民歌之曰王稚子世未有平徭後百姓喜遷充州刺史部中肅清徵拜侍御史洛陽令聰明惠斷公平廉正抑強扶弱化行不犯發奸擿伏思若有神京華密靜權豪畏敬元興元年卒百姓痛哭二縣弔祭行人商旅莫不祭之賈胡左威遭其清理制服三年洛陽弦歌之為立祠天子悼惜每下詔書德令必賜後嗣與早茂等為伍

王堂字敬伯鄴人也初臨巴郡進賢達士舉孝子嚴永隱士黃錯及張璠陳髦民為立祠徙任左扶風政教嚴明帝舅車騎將軍閻顯大將軍竇憲中常侍江京等囑託輒拒之白鹿見象不以為祥徙魯相又徙汝南守舉陳蕃為功曹應嗣司隸校尉號知人之鑑馬顥字叔宰鄴人也少師事楊仲桓及蜀郡張光超後又事東平虞叔雅初為謁者威儀濟濟為成都令遷越雋太守所在著稱為梁冀所不善隱居作易章句及刺著說修黃老恬然終日

翟酺字子超雒人也少事段熲以明天官為侍中尚

書常見太史令孫懿歔歔涕泣曰圖書有賊臣孫登將以才智為黃門開路君表相應之是以悽愴後為京兆尹光祿大夫將作大匠上言漢四百年當有弱主閉門聽政數在三百年之間薦故太尉龐參故司徒李郃明通三才忠正可以輔世所言每指利疾權貴誣酺及尚書令高堂之交搆免死者援神契經說卒家

郭賀字喬卿雒人也初為太守黃幸戶曹幸有事與漢中太守李榮俱被徵賀勸幸星行詣詔獄自歸得免榮稽留詔殺之由是顯名太守蔡茂命為主簿茂

夢坐太極殿上得嘉禾三穗以問賀對曰明府位當
至三公旬月歲遷司徒表賀明律令稍遷侍中尚書
僕射司隸校尉荊州刺史明帝南巡狩善其治徵河
南尹卒天子痛惜賜錢三十萬

鐔顯字子誦鄴人也——蔡弓字子騫維人也俱携手
共學冬則侍親春行受業與張霸李郃張皓陳禪為
友共師司徒——魯恭顯又與王稚子同見察孝於太
守陳司空歷豫州刺史光祿大夫侍中衛尉弓為廬
江太守徵拜郎而霸郃皓禪皆至公卿

李尤字伯仁——李勝字茂通維人也侍中賈逵薦尤

有相如楊雄之才明帝召作東觀碑雍德陽諸觀賦
銘懷戎頌百二十銘著政事論七篇帝善之拜諫大
夫樂安相後與劉珍共撰漢紀孫克有文才勝為東
觀郎著賦誄論頌數十篇

王稚字叔起堂幼子也屢拒孝廉公府十五辟公車
徵及授二千石徵以太常終不詣年八十一卒四人
祿其本行謚曰憲父癸未詔書以安車聘請會已亡
馮信字季誠鄴人也郡三察孝廉州舉茂才公府十
辟公車再徵不詣公孫述時託目青盲有婢姦其前
陽不覺述卒以年老不出

董扶字茂安——任安字定祖綿竹人也家居教授弟子自遠而至扶初應賢良方正詣京師宰府十辟公車三徵再舉有道為侍中觀漢將亂求為屬國還蜀安察孝廉及茂才公府辟公車徵皆不詣卒布衣弟子杜徵何宗杜瓊皆名士至卿佐

王商字文表廣漢人也博學多聞州牧劉璋辟為治中試守蜀郡太守荆州牧劉表大儒南陽宋仲子遠慕其名皆與交好許文休稱商中夏王景興輩也商勸璋攬竒拔雋甚多匡掾薦致名士安漢趙韙——陳實盛先塾江龔楊趙敏黎景閔中王澹江州孟嘉

皆至州右職郡守又為嚴李立祠正諸祀典在官一十年卒

劉寵字世信綿竹人也出自孤微以明公羊春秋上計闕下見除成都令政教明肅時諸縣多難治乃換寵為郫令又換郫安漢皆垂績還在成都遷牂牁太守初乘一馬之官布衣疏食儉以為教居郡九年乘之而還吏人為之立銘王商陳實當世貴士皆與為友

段恭字節英雄人也少周流七十餘郡求師受學經三十年凡事馮翊駱異孫泰山彥之章渤海紀叔陽

遂明天文二卷東平虞叔雅學絕高當世遂遊於蜀
恭以朋友禮待之後為上計掾會有司劾太尉龐參
兼舉茂才孝廉參性忠正亮直為貴戚所擯以患發
病遠近稱寃恭不能耐其枉抗疏表參忠直不當以
讒佞傷毀忠正帝悟即日召西曹掾問疾尋羊酒慰
勞參忠

姜詩字士遊雒人也事母至孝母欲江水及鯉魚膾
又不能獨食須鄰母共之詩嘗供備子汲江溺死秘
言遣學不使母知於是有涌泉出於舍側有江水之
香朝朝出鯉魚二頭供二母之膳其泉灌田六頃施

及此隣公孫述平後東精為賊掠害不敢入詩里時
大荒餓精致米肉與詩詩埋之永平三年察孝廉明
帝詔曰大孝入朝孝廉一切皆平之除江陽符長所
居鄉皆為之立祠

王忱字少林新都人也遊學京師見客舍有一書生
困病忱隱視奄忽使絕有金十斤忱以一斤買棺木
九斤還腰下莖埋之後為大度亭長大馬一匹來入
亭中又有繡被一領飛墮其前人莫識者郡縣以異
忱後乘馬到雒縣馬牽忱入宅舍主人問忱所由得
馬忱具說其狀并及繡被主人悵然曰卿何陰德而

致此忱說昔埋書生事主人驚曰是我子也姓金名
 彥卿乃葬之不報天彰卿德辟舉茂才除郿令宿釐
 亭中數有人為鬼所殺忱上樓夜半有女子稱冤曰
 妾涪令妻也向之官宿此枉為亭長所殺大小二十
 口埋在樓下奪取財物忱曰汝何故以怕殺人女子
 曰妾不得白日惟依夜燠人眠不肯應恚故殺之初
 來時言無衣忱以衣衣之言訖投衣而去旦召遊徼
 詰問其服即收同謀十餘人殺之送涪令喪還郡里
 當世稱之游徼忱門下人即先
 殺涪令於釐亭者

羊碁字仲魚鄰人也父為交州刺史卒官碁迎喪不

敢取官舍一物郡三察孝廉公府辟州別駕皆不應

太守尹奉棄刑名行禮樂請為功曹刺史必欲借其

自佐不得已為別駕後為太守孫寶蔡茂殺諷功曹

當欲渡津津吏滯停車待之三日將宿中亭中有縣

吏引車避之為野王令

朱倉字雲卿什邡人也受學於蜀郡張寧食豆飲水

以諷誦同業憐其貧資給米肉終不受著河洛解家

貧恒以步行為郡功曹每察孝廉羞碌碌詣公府試

不就州辟治中從事以諷詠自終

折像字伯式維人也其先張江為武威太守封南陽

折侯因氏焉父國為鬱林太守家資二億故奴姬八
百人盡散以施宗族卹贍親舊葬死弔喪事東平虞
叔雅以道教授門人朋友自遠而至時人為諺曰折
氏客誰朱雲卿段節英中有佃子趙仲平但說天文
論五經

杜貞字孟宗綿竹人誦書百萬言兄事翟酺酺免後
尚書令與司隸校尉枉劾之復徵詣獄貞上章救之
受掠笞六百獄中明酺無事京師壯之以漢道微
財施宗族不應公州辟命及辭長史侯迎每交於門
乃斷髮以自絕

諒輔字漢儒新都人為郡五官掾時天大旱請雨不
降輔出禱祈乃積薪祝神曰不雨則欲自焚為貪叨
吏謝罪百姓言終即雨

韓揆字伯彥綿竹人也為令錡哀主簿值黃巾賊入
界扶衰走入草中哀遣求隱醫處未還哀為賊所得
見害揆殞殮葬埋訖詣從事賈龍求兵討賊賊破曰
本報令君而苟自活非忠乃自殺

左喬雲綿竹人也少為左通所養為子通坐任徒徒
逃吏欲破通臚通無壯子故為吏所侵喬雲時年十
三喟然憤怒以銳刀殺吏解通將走令出追初聞以

為壯士及知小兒為之流涕

楊寬字叔仲新都人父斌證令萬世太守投諷以忠義壯聞寬為郡吏鄉人馬閏章言太守五方寬與兄偕詣獄證之得理後方當遷南郡閏復章之寬乃發閏私閏伏罪友人汝錕為張明所殺寬怒縛明送錕家使自謝之也

審叔字茂泰廣漢人與友人張昌共受業太學昌為河南大豪呂條所殺叔殺條自拘河南獄順帝義而赦之

張鉗字子安廣漢人也師事犍為謝裒裒死負土成墳三年裒子為人所殺鉗復其仇自拘武陽獄會赦免當世義之

賈翽字元集什邡人也雒孟伯元為父復讐聞翽名姓投之雒縣追伯元蹤翽歎曰士以義遇我豈可背哉殺雒縣必移什邡負我君乃自殺李勝言之以方虞卿魯之朱家

郭玉字通直新都人也明方術伎妙用針作經方頌說官至太醫丞校尉

秦宓字子勅綿竹人也初隱遁不應州郡之命丞相亮領益牧選為別駕中郎將吳使張溫將反命亮率

百官餞之温與宓語荅問若響應聲辭義雅美温大敬服以為蜀之有宓猶魯仲尼也遷長水校尉司農宓其有通理弟子譙周具傳其業

李朝字永南弟邵字偉南鄰人也王士字義強從弟甫字國山文表諸弟也先主領牧朝為別駕群下上先主為漢中王其文朝所造也後丞相亮府辟西曹掾亦有文才兄弟三人號三龍士歷宕渠犍為益州太守甫善言議關人流美稱自綿竹令為州右職鐔承字公文鄰人也歷郡守州右職為少府太常時費姜秉政孟光來敏皆棲遲承以和獨立特進之

王累新都人也州牧璋從別駕張松計遣法正迎先主主簿黃權諫不納累為從事以諫不入乃自刎州門以明不可

鄭度綿竹人也先主自葭萌南攻說牧璋曰左將軍懸軍襲我野穀是資急駟巴西梓潼民內涪水以南一切燒除野穀固壘待之彼請戰不許久無所資不過百日必當回先主聞而惡之璋不納言雖在天亦由璋之愚

彭羸字永年廣漢人有俊才劉璋時坐事為徒及先主入自託龐統為州右職失主意左遷江陽太守羸

怨望諸葛亮以為心大志廣難可保勸先主因事誅之語在本傳

李邈字漢南邵兄也牧璋時為牛鞞長先主領牧為從事正旦命行酒得進見讓先主曰振威以將軍宗室肺腑委以討賊元功未効先寇而滅邈以將軍之取鄙州甚為不宜也先主曰知其不宜何以不助之邈曰匪不敢也力不足耳有司將殺之諸葛亮為請得免久之為犍為太守丞相參軍安漢將軍建興六年亮西征馬謖在前亮將殺之邈諫以秦赦孟明用霸西戎楚誅子玉二世不競失亮意還蜀十三年亮

卒後主素服發哀三日邈上疏曰呂祿霍禹未必懷反叛之心孝宣不好為殺臣之君直以臣懼其福主畏其威故姦萌生亮身仗強兵狼顧虎臣五大不在邊臣常危至今亮殞歿蓋宗族得全西戎靜息大小為慶後主怒下獄誅之

任安母姚氏也雍穆閨門早寡立義資安遂事大儒安教授每為賑卹其弟子以慰勉其志於是安之門生益盈門

龐行姜詩妻也事姑晝夜紡績以給供養子汲江溺水死秘言遺詣學常作冬夏衣投水中託言寄與子

詩呼妻使為姑春應命遲見遣不敢遠去遊於外供給因隣母致姑勅還

義舊狄道長姜穆女綿竹司馬雅妻也既許婚父坐事徙朔方雅就婚死顧人送其喪尋父母死朔方義舊獨與弟孤居十年士大夫求終不肯乃上疏自訟求還鄉里天子愍悼下朔方使送遂下詔書定律令女已許嫁不得從父母徙

紀配廣漢殷氏女廖伯妻也年十六適伯伯早亡已自有美色慮人求已作詩三章自誓心而來者猶衆父母將許乃斷指明情養子猛終義太守薛鴻圖像

府庭

彭非廣漢王輔妻也王和新都人便敬妻也李進娥鄰人馮季宰妻也輔早亡叔父欲改嫁非乃詣太守五方截髮自誓敬亦早亡和養孤守義蜀郡何王因媒介求之兄曉喻以公族可憑和恚割其一耳季宰亦早亡父母欲改嫁進娥亦剪髮自誓各養子終義正流廣漢李元女楊文妻也適文有一男一女而文沒以織履為業父欲改嫁乃自沉水中宗族抹之幾死得免太守五方為之圖像

相烏德陽人袁稚妻也十五適稚二十稚亡無子父

母欲改嫁之便自殺袁福亦德陽人王上妻也有二
子上以喪親過哀死福哀感終身父母欲改嫁乃自
殺

汝敦妻某敦兄弟共居有父母時財嫂心欲得妻勸
送二兄敦盡讓田宅奴婢與兄自出居後敦耕得金
一器妻復勸送二兄夫妻共往嫂性恠嗇謂欲借貸
甚不悅及見金踊躍兄感悟即出妻讓財還弟弟不
受相讓積年後並察孝廉世為冠族
犍為士女

王延世字長叔資中人也建始五年河決東郡汜

兗豫四郡三十二縣沒官民屋舍四萬所御史大夫
尹忠以不盡職致河決自殺漢史案圖緯當有能循
禹之功在犍犸之資陽求之正得延世徵拜河堤謁
者治河以竹落長四丈大九圍夾小船載小石治之
三十六日隄防成帝嘉之改年曰河平封延世關內
侯拜光祿大夫乃賜黃金百斤

董鈞字文伯資中人也少受業於鴻臚王臨永平初
議天地宗廟郊祀儀禮鈞與太常定其制又定諸侯
王喪禮歷城門校尉五官中郎將以儒學貴稱繼叔
孫通

張皓字叔明武陽人也以聰明辟大將軍掾遷尚書僕射彭城相進隱士閭丘遷等徵拜廷尉延光三年安帝將廢太子為濟陰王皓與太常相馮太僕來歷爭之安帝不許及安帝崩濟陰得立為順帝以皓為司空久之免後徵為廷尉清河趙騰等坐謗訕當誅所引八十餘人皓以聖賢明義爭之咸稱平當趙旂字子鸞資中人也初臨耳陵引農郡甚善治民徵尚書遷司隸校尉時梁冀子弟放恣旂以法繩之不敢為非京師肅清桴鼓不鳴

楊渙字孟文武陽人也以清秀博雅歷臺郎相稍遷

尚書中郎司隸校尉甚有嘉聲美稱

楊準字伯邳漢安縣人也初為郡太守尉李固薦準累世忠直拜尚書太傅陳蕃表為河東入為尚書令奏書治南陽太守曹麻潁川太守曹騰濟南太守孫訓等子弟依託形勢淫從徵廷尉治罪訓梁冀婦家子也於是憚之又薦朱禹盛精滕延為尚書陸稠為郡守皆名士也桓帝即位拜河南尹遷司隸校尉冀叔父梁忠為執金吾不朝正初劾奏之朝士服其公亮徙將作大匠

楊莽字翁君武陽人為功曹刺史王尊當之州移書

諸郡不得遣迎惟犍為遣奔何霸巴郡遣嚴尊尊大
怒奔前對曰使君不使奉迎謙也太守承迎敬也謙
敬上下之節不可廢也尊乃欣請辟別駕舉茂才官
至揚州刺史

費貽字奉君南安人也公孫述時漆身為厲佯狂辟
世述破為合浦守蜀中歌之曰節義至人費奉君不
仕亂世不辟惡君脩身於蜀紀名亦足後世為大族
任永字君業犍道人長曆數王莽時託青盲公孫
述時累徵不詣子溺井中死見而不言婢淫於前面
而不恠述平乃曰世適平日即清妻自殺光武徵之

以年老不詣卒

杜撫字叔和資中人也

按後漢書作武陽人

少師事薛漢治五

經教授門生千人太守王卿召為功曹司徒辟不及
聞公免必往承問東平憲王為驃騎將軍辟西曹掾
後罷為王師在驃騎府者遣之數年乃去數應三公
徵撫侍送故公作詩通議說弟子南陽馮良亦以道
學徵聘

趙松字君橋武陽人為童子數咨問費貽及知其避
世密與周旋終不露之也述平舉茂才為上黨太守
張綱字文紀司空皓子也在漢朝公平廉正權宦側

目憚之漢安元年以光祿大夫持節與侍中杜喬循
行州郡考察風俗出宮垣埋車先奏太尉相烏司徒
劉壽尸祿素餐不堪其職出城又奏司隸校尉趙峻
河南尹梁不疑汝南太守梁乾等賊穢濁亂檻車送
廷尉治罪天子以乾梁冀叔父貶秩免峻等又奏魯
相寇儀儀自殺威風大行郡縣莫不肅懼還冀恨之
出為廣陵太守承叛亂後懷集撫卹甚有治化在官
十年卒子續為尚書續弟方為豫州牧子孫數世至
六世

朱遵字孝仲武陽人也公孫僭號遵為健為郡功曹

領軍拒戰於六水門衆少不敵乃埋車輪絆馬必死
為述所殺光武嘉之追贈復漢將軍郡縣為立祠
趙敦字建侯武陽人也初為新都令德禮宣流三司
及大將軍梁冀累辟終不詣冀辟書不絕後冀自殺
使者監守不使人弔問敦獨往弔祭訖自拘有司天
子赦之

隗相字叔通棘道人也養母至孝母食欲江中正江
水相冬夏汲之一朝有橫石生正流中哀帝世察孝
廉平帝世為郎

吳順字叔和棘道人也事母至孝赤烏巢其門甘露

降其戶察孝廉永昌太守

揚洪字季休武陽人也先主領牧為部屬從事及征漢中丞相亮表為蜀郡太守先主疾病永安召亮東行漢嘉太守黃元反後主從其計克元封關內侯後為中郎將越騎尉清公亮甚信任之

伍梁字德山南安人也儒學雅尚州選迎牧諸葛亮為功曹遷五官中郎將

費詩字公舉南安人也先主領牧為前部司馬群臣勸先主稱尊號詩上疏曰殿下以曹操父子逼主篡盜故乃羈旅萬里糾合士衆將以討賊今大敵未剋

而先自立恐人心疑惑昔高祖獲子嬰猶尚推讓况未出門便欲自立耶以是左遷部永昌從事建興三年從丞相亮南征魏將李鴻來降說魏新城太守孟達欲背魏向蜀亮方北向欲招達為外援欲與書詩進曰孟達小子昔事振威不忠後事先帝背叛反覆之人何足與書也亮嘿然詩終劉氏之世官位不盡其才君子以昭烈之弘曠武侯之明達詩吐直言猶用凌遲况庸主昏世率意直言而望肆効者哉楊義字文然武陽人也輔漢將軍張裔薦為丞相亮主簿大司馬蔣琬辟東曹掾歷二郡太守為射聲校

尉性簡略未曾以其言加人酒後言笑多慢詞失大將軍姜維意為維所廢延熙十八年依季漢輔臣讚在蜀書

張翼字伯恭文紀孫也以文武才幹歷征西鎮南大將軍封亭侯延熙十八年與大將軍姜維西征大破魏雍州刺史王經於狄道經衆死泔水者數萬人維欲進翼諫不可必進無功時維屢出隴西翼常廷爭以國小不宜黷武必為蛇豕不為不得已每每怏怏從行景耀元年翼在車騎將軍如州刺史蜀平後死

進武陽楊氏女大匠廣漢王堂長子博妻也博後母文有母儀之德進揚則其教為行閨門雍穆牂牁太守李禕家每不和歎恨徒富貴學問不及博家也

陽姬武陽人也生自寒微父坐事閉獄楊渙始為

尚書郎告歸郡縣敬重之姬為處女乃邀道扣渙馬訟父罪言辭慷慨涕泣渙懇告郡縣為出其父因奇其才為子文方娉之結婚大族二弟得士官遂世為宦門後文方為漢中太守以趙宣為賢將察孝廉函封未定病卒姬秘不發先遣孝廉上道乃發喪宣得進用姬之力也後文方兄子伯邳為司隸校尉時姬

長子穎伯龔州刺史仲子頰二千石伯邳以稟叔母
教迎在官舍每教邳政治伯邳卻舉茂材選有二人
伯邳欲用老者嫌以其老欲舉五方而其年幼以咨
叔母勸舉方後趙宣為犍為五方為廣漢姬尚在故
吏之敬四時承問不絕

周度隸道人也相登妻十九登亡中牟令吳厚因人
求之斷髮以誓志後人猶欲求之乃割其鼻養子早
亡其妻左亦年十九遂俱守義世感歎婦姑之真專
其節操也

曹敬姬南安人也周紀之妻十七出適十九紀亡遺

生子元餘服闋父母以許孫賓詒母病迎還知之自
投水人赴之氣已絕一日一夜乃蘇息送依紀第居
訓導元餘號為學士年九十卒

貞玦字瓊玉牛鞞程氏女張惟妻也十九適惟未暮
惟亡無子養兄子悅供養舅姑夙夜不怠資中王冲
欲娶玦玦叔父肱荅以女志不可奪冲為太守李嚴
督鄞嚴記縣遣孝義掾奉羔鴈宣太守命聘之玦乃
自投水拯援不死後太守蘇高為立表太守蜀郡闕
遣仁恕掾論曰貞玦太守章陵劉威又為作頌故稱
述也

韓姜棘人尹仲讓妻也二十讓亡服除資中董臺因
從事王為表弟求姜不許臺門生左習王蘇以為姜
可奪教姜家言母病迎還韓氏因逼成婚姜聞故自
殺太守巴郡龔楊哀之殺習蘇以報姜死

姬南安人武陽儀成妻也成死以已年壯無子將葬
乃預作殯殮具毒藥湏夫棺入墓拊棺吞藥而死遂
同葬縣以表郡郡言州州上尚書天子咨嗟下書每
大赦賜家帛四疋蜀穀二石

趙媛姜資中趙盛道妻也建安五年道坐過夫婦閉
獄于翔方年五歲姜謂道曰官有常刑君不得已矣

妾在後何益君門戶君可同翔亡命妾代君死可得
繼君宗廟道依違數日姜苦言勸之遂解脫給衣糧
使去代為應對度走遠乃告吏殺之後遇赦父子得
還道雖仕官當世痛感終不更娶翔亦不仕耳

黃帛棘道人張貞妻也貞受易於韓子方去家三十
里舡覆死貞弟求喪經月不得帛乃自往沒處躬訪
不得遂自投水中大小驚睨積十四日持夫手浮出
時人為語曰符有先絡棘道張帛求其人天下無有
其偶縣長韓子冉嘉之召帛子為縣股肱

華陽國志卷第十中

華陽國志卷第十中

漢中士女

鄭子真褒中人也玄靜守道履至德之行乃其人也
教曰忠孝愛敬天下之至行也神中五徵帝王之要
道也成帝元舅大將軍王鳳備禮聘之不應家谷口

世號谷口子真亡漢中與立祠

神中五徵未詳其義

衛衡字伯梁南鄭人也少師事隱士同郡樊季齊以
高行聞郡九察孝廉公府州十辟公車三徵不應董
扶任安從洛還過見之曰京師天下之市朝也足下
猶之人耳何其遠以虛名屢動徵書若至中國則

價盡矣衡笑曰時有險易道有汙隆若樊季齊楊仲
相雖應徵聘何益於時乎苟無所則屋軻恹恹是以
君平子真不屈其志其予之徒也哉吾何虛假之有
安扶服之敬其言也

鄧先成固人也景帝時御史大夫晁錯患諸侯強大
建議減削會吳楚七國謀反假言誅錯故吳相袁盎
譖帝殺之拜盎太常使赦七國七國遂叛鄧公為謁
者人言軍事問曰士國聞晁錯死罷兵不對曰吳王
即山鑄錢者海為鹽謀反積數十年錯患之故欲削
弱為萬世策諸侯憂之討畫始行身死東市諸侯莫

憚內杜忠臣之口外為諸侯報怨臣竊為陛下不取
也帝歎息曰吾亦服之武帝初為九卿

張騫成固人也為人強大有謀能涉遠為武帝開西
域五十三國窮河源南至絕遠之國拜校尉從討匈
奴有功遷衛尉博望侯於是廣漢緣邊之地通西南
之塞豐絕遠之貨令帝無求不得無思不服至今方
外開通騫之功也

張猛字子游騫孫也師事光祿勳周堪以光祿大夫
給事中侍元帝帝當廟祭濟渭欲御樓舡御史大夫
薛廣德當車免冠乞頸血汚車論陛下不得廟祭矣

帝不悅猛進曰主聖則臣直今乘舡危就橋安聖至不乘危故大夫言之帝曰曉人不當如是也後與周堪俱以忠正為幸臣弘恭石顯所譖毀乍出乍徵堪平和猛卒自殺

楊上孫成固人也治黃老家累千金厚自奉養臨終告其子曰我死輟葬以復吾真但為布囊盛尸入地七尺既下從足脫之以身親土其子不忍見王孫友人祁侯諫之王孫曰厚葬無益死者也夫俾財送死今日入明日發此直無異暴骸中原暴以幣帛隔以棺槨哈以珠玉後腐朽乃得歸土不可故吾欲早就

直宅祁侯無以易卒輟葬如其言

李郃字孟節南鄭人也少明經術為郡候吏和帝遣使者二人微行至蜀宿郃候舍郃為出酒夜飲露坐郃問曰君來時寧知二使何日發來耶二人恠問之郃指星言曰有二使星入益部後一人為漢中太守命為功曹察孝廉遂馳名為尚書郎徒左丞稍遷至尚書僕射尚書令拜司空又進司徒清公直亮當世稱名順帝世薨

李固字子堅郃子也陽嘉三年以對策忠充拜議郎大將軍梁商后父也表為從事中郎授荊州刺史值

州部有亂至州生友其賢者南陽鄭叔躬宋孝節零

陵支宣雅表薦長沙桂陽太守趙歷卒已奏免江夏

南郡太守孔疇高賜等州士自然安靜按本傳固奏

賜等懼罪厚賂梁冀仍徙固太山太守徒太山太守克寧盜賊入為將

作大匠多致海內名士南陽樊英江夏黃瓊廣漢楊

厚會稽賀純光祿周舉侍中杜喬陳留楊倫河南尹

存東平王惲陳國何臨清河房植等皆蒙徵聘轉大

司農順帝崩太后臨朝拜太尉與后弟大將軍梁冀

太傅趙峻並錄尚書冲帝崩時徐揚有盜賊太后欲

不發喪須召諸王至固爭不可言國家多難宜立長

君太后欲專權乃立樂安王為質帝質帝崩太后復

與梁冀謀所立固與司徒南郡胡廣司空蜀郡趙戒

書與冀引周勃霍光立文宣以安漢之策闔鄧廢立

之禍言國統三絕期運厄會與崩之漸在斯一舉宜

求賢王親近不可寢嘿也冀得書召公卿列侯議所

立三公及鴻臚杜喬僉舉清河王蒜冀然之奏御太

后中常侍曹騰私恨蒜說冀明日更議廣戒從冀固

與喬必爭蒜宜立中興才也且年長識義必有厚將

軍冀不聽策免固喬歲餘取下獄以無事出之京師

市邑皆稱千萬歲冀惡其為人所善更奏繫之固書

與二公曰吾欲扶持漢室使之比隆文宣何圖梁將軍迷謬諸子曲從以吉物為凶成事為敗漢家衰微從是始矣將軍亦有不利吾雖死上不慙於天下不愧於人求義得義死復何恨遂自殺二公得書歎息流涕士民咸哀哭之桓帝無道冀尋受誅漢家遂微政在闕官無不思固也

張亮則字元脩南鄭人也為牂牁太守威著南土永昌越雋夷謀欲反畏則換臨其郡相諫而止號曰卧虎以戍狄勲遷護羌校尉徵拜扶風又換臨桂陽皆平盜賊巴郡板楯反拜隆集校尉鎮漢中徙梁州刺史又為魏郡太守所在稱治靈帝崩後大將軍袁紹表為長史不就丞相曹公拜度遼將軍

趙宣字子雅南鄭人也出自寒微以溫良博雅太守犍為楊文方深器異之遂察孝廉官至犍為太守

趙瑤字元珪 琰字稚珪凡七兄弟宣子也皆以令德著聞瑤少有公望瑤始為緱氏袁趙二公相與書曰趙瑤在緱氏猛虎歸迹百里均耳叔平何難遷扶風太守徙蜀郡司空張溫謂之曰昔第五伯魚徙蜀郡為司空掃吾第以待足下矣瑤曰諾尋換廣漢卒琰始為青州刺史部下清肅徙梁相徵拜尚書不就

卒

陳綱字仲卿成固人也少與同郡張宗受學南陽以
母喪歸宗為安衆劉元所殺綱免喪往復之值元醉
卧還湏醒乃殺之自拘有司會赦免三府並辟舉茂
才拜弘農太守初至有兄弟自相責引退是後無訟
者在官九年卒天子痛惜賜家錢四十萬

李法字伯度南鄭人也桓帝時為侍中光祿大夫數
表宦官大盛椒房大重史官記事無實錄之才虛相
褒述必為後笑帝怒免為庶人恬然以咎失為已
久之徵拜汝南太守遷司隸校尉湛然無自得之容

李燮字德公太尉固子也父死時二兄亦死燮為娣
所遣隨父門生王成亡命徐州傭酒家酒家知非常
人以女妻之延熹二年梁冀誅後月經陽道暈五車
史官上書昔有大星升漢而西捲舌楊芒迫月熒惑
犯帝座則有大臣枉誅星在西方太尉回應之今暈
如之宜有赦命錄其遺嗣以除此異於是下赦燮得
返舊四府並辟公車徵議郎與趙元珪潁川賈偉節
荀慈明張伯慎為友伯慎為潁川太守與慈明交相
言論偉節與焉京師以為臧否伯慎問趙元珪曰德
公所言何元珪曰無言也伯慎追嘆曰當如德公兒

輦徒靡沸耳慈明亦寤而心變拜東平相國王為黃
巾所沒得出天子復封之燹以為不可果敗遷京北
尹時人為之語曰李德公父不欲立帝子不欲立王
陳雅字伯臺成固人也靈帝時為諫大夫闕官用事
上疏曰昔孝和帝與中常侍鄭眾謀誅大將軍竇憲
由是宦官秉權安帝幼冲和熹太后兄大將軍鄧騭
輔政太后適崩中常侍江京等殺騭安帝登段黃門
孫穉又殺車騎將軍閻顯孝桓帝又與中常侍單超
等共誅大將軍梁冀陛下即祚太傅陳蕃大將軍竇
武尚書令尹勲等欲誅宦官絕其奸擅盡忠王室建

萬世策機事不密為中常侍朱瑀等所殺此即陛下
所見今宦官強盛威傾人主天下鉗口莫敢言者海
內怨望妖異并作四方兵起萬姓辛苦陛下尚可以
安奈後嗣何帝不省納出為巴郡太守年七十五卒
臨終戒其子曰期運推之天下將大亂雄夫力爭無
以貨財為意吾亡依山薄葬亡歲餘靈帝崩大將軍
何進復為黃門所殺海內果亂終成三國也
閻憲字孟度成固人也名知人為綿竹令以禮讓為
化民莫敢犯男子杜成夜行得遺物一囊中布錦二
十五疋求其主還之曰縣有明君何敢負其化童謠

歌曰閭尹賦政既明且昶去苛去辟動以禮讓遷蜀
郡民泣涕送之以千數

李歷字季子太尉固從弟也少脩文學性行清白與
鄭康成陳元方齊名弱冠拜新城令朝請都督

程苞字元道南鄭人也光和二年前上計吏時巴郡板
楮反軍旅數起征伐頻天子患之訪問益州計考以
方略苞對言板楮忠勇立功先漢為帝義民羌入漢
中輒蒙其力東征南戰世有勞由不料卹以致叛
亂非有儲盜能相群殺兵臨之未必卒得不如但選
明能太守恩信懷服自然安定矣天子從之卒如其

言後在道卒

祝龜字元靈南鄭人也年十五遠學汝穎及太學通
博蕩達能屬文太守張府君奇之曰吾見海內士多
矣無如祝龜者也州牧劉焉辟之不得已行授葭萌
長撰漢中耆舊傳以著述終

段崇字禮高南鄭人也太守河間鄭廩命為主簿永
初四年涼州羌反溢入漢中從廩屯褒中虜東攻廩
欲戰崇諫不可願固壘待之廩不聽出戰敗績崇與
門下吏王宗原展及子勃兄子伯生推鋒死戰衆寡
不敵崇等皆死羌遂得虜殺之

程信字伯義南鄭人也時為功曹守居馳來赴難殞
殮塵喪送還鄉里訖乃結故吏冠蓋子第二十五人
言共報羌各募敢死士以待時太守鄧成命信為五
官元初二年虜復來信等將其同志率先奮討大破
之信被八創死天子咨嗟元初五年下詔書賜信崇
家穀數千斛有王宗原展及嚴寧李容姜濟陳巳曹
廉勾矩劉旌九人皆以令義為鄭塵所命王宗原展
與塵同死寧容等七人與信共并命詔書既賜崇信
家又賜九子家穀各五百斛給死事

燕邠字元侯趙嵩字伯高南鄭人也陳調字元化仲

卿孫也邠為刺史郤儉從事使在葭萌與從事董續
張胤同行儉為黃巾賊王饒趙播等所殺邠聞故哀
勸說馥胤赴難二子不可邠難曰使君已死用生何
為獨死之牧劉焉嘉之為圖象學官誅馥等嵩事太
守蘇固固為米賊張脩所疾殺嵩痛之仗劔直入脩
營殺十餘人幾獲脩死陳調少尚遊俠聞固死聚賓
客百餘人攻脩大破之進攻脩營乃與戰以傷死又
有陳術字申伯作者舊傳者也失其行事歷新城魏
興上庸三郡太守及錫光等不列也

穆姜安眾令程祗妻司隸校尉李法姊也祗前妻有

四子與敦觀豫穆姜生二子淮基祇亡與等憎惡姜
姜視之愈厚其資給六子以長幼為差衣服飲食凡
百如之久與等感寤自知失子道謁南鄭獄受不愛
親罪太守嘉之復除門戶常以二月八月社致肉三
十斤酒米各二斛六斗六子相化皆作令士五人州
郡察舉基字稚業特雋免為南郡太守

泰瑛南鄭楊相妻大鴻臚劉巨公女也有四男二女
相亡教訓六子動有法矩長子元珍出行醉母十日
不見之曰我在汝尚如此我亡何以帥郡弟子元珍
叩頭謝過次子仲珍白母請客既至無賢者母怒責

之仲珍乃革行交友賢人兄弟為名士泰瑛之教流
於三世四子才官隆於先人故時人為語曰三苗止
四珍復起

杜泰姬南鄭人趙宣妻也生七男七女若元珪稚珪
有望五人皆令德其教男也曰中人情性可上下也
在其檢耳若放而不檢則入惡也昔西門豹佩韋以
自寬宓子賤帶弦以自急故能改身之恒為天下名
士戒諸女及婦曰吾之隻身在乎正順及其生也恩
存於撫愛其長之也威儀以先後之體貞以左右之
恭敬以監臨之懃恪以勸之孝順以內之忠信以發

之是以皆成而無不善汝曹庶幾勿忘吾法也後七子皆辟命察舉牧州守郡而漢中太守南鄭令多與七子同歲季考上計無不脩敬恭姬執子孫禮

禮珪成固陳省妻也楊元珍之女生二男長娶張度遼女惠英少娶荀氏皆貴家豪富從婢七八資財自富禮珪勅二婦曰吾先姑母師也常言聖賢必勞民者使之思善不勞則逸逸則不才吾家不為貧也所以粗食給吾者使知苦難備獨居時二婦再拜奉教從孫奉上微慢珪抑絕之感悟華行遭亂流行宗長欲見之必自嚴飭從子孫侍婢乃外兒之曰此先

法也四時祭禮自親養牲釀酒曰天祭禮之尊也年八十九卒惠英亦有淑訓母師之行者也

文姬南鄭趙伯英妻太尉李固女也父為梁冀所免兄憲公季公罷官歸文姬歎曰李氏滅矣乃與二兄議匿弟燮父門生王成亡命徐州涕泣送之謂成曰託君以六尺之孤若李氏得嗣君之名義參於程杵矣久之遇赦燮得還行喪服闋勅之曰先公為漢忠臣雖死之日猶生之年梁冀已族弟幸得濟豈非天乎慎勿有一言加梁氏加梁氏則連主上是又掇禍也奉行之徒成在徐州各異處傭賃而私相往來成

病亡燹四時祭之

陳順謙成固人也順謙適鄧令曹寧十九寡居長育遺孤八十餘卒兄弟陳規著書歎述之惠謙適張亮則在扶風官下吏白欲重禁嚴防以肅非元脩訪於惠謙惠謙曰恢弘德教養廉免恥五刑三千蓋亦多矣又何加也兄弟伯思學仙道惠謙戒之曰君子疾沒世名不稱不忠年不長也且夫神仙愚惑如繫風捕影非可得也伯思乃止陳伯臺稱云女尚書之後耳

禮脩趙嵩妻張氏女也姑酷惡無道遇之不以禮脩終無愠色及寧父母父母問之但引咎不道姑卒感寤更慈愛之鄉人相訓曰作婦不當如趙伯高婦乎使惡姑知變可謂婦師矣後姑病女來省疾姑却之曰我以固當絕于賢婦手中後遭米賊嵩死乃碧塗面亂首懷刀託言病賊不逼也養遺生女依父叔立義終身者也

韓樹南南鄭人趙子賤妻也子賤初為郡功曹李固之誅詔書下郡殺固二子憲公季公太守知其枉遇之甚寬二子託服藥死具棺器欲因出逃子賤畏法勅吏驗實就殺之及固小子燹得還子賤慮燹報仇

賃人刺之燮覺告郡殺子賤初樹南諫子賤子賤不從及臨死許共并命兄弟婢侍婢視守之經百餘日乃怠白兄嫂念一死萬不得生不敢復圖死也上下以為信然無幾時於墓下自殺

梓潼人士

文齊字子奇梓潼人也孝平帝末以城門校尉為犍為屬國遷益州太守造開稻田民咸賴之公孫述時拒郡不服述拘其妻子許之公侯招之不應乃遣使由交趾貢獻河北述平世祖嘉之徵拜鎮遠將軍封成義侯南中咸為立祠子忱有令德為北海太守


李業字巨遊梓潼人也少執志清白太守劉咸慕其名召為功曹不詣咸怒欲殺之業徑入獄咸釋之公孫述累聘不應述怒遣鴻臚尹融持毒藥酒逼之業笑曰名不可毀身可殺不可辱也遂飲藥死述恥殺名士賜錢百萬子翬逃匿不受建武中察孝廉為遂久令

景毅字文堅梓潼人也太守丁羽察舉孝廉司徒舉治劇為沅陽侯相高陵令立文學以禮讓化民遷太守上封吏守闕請之三年不絕以子顧師事少府李膺膺誅自免久之拜成都在遷益州太守上封吏民

涕泣送之至沮者七百人白水縣者三百人值益州
亂後米斗千錢穀至恩化暢洽比去米斗八錢鳩鳥
巢其廳孕育而去三府表薦徵拜議郎自免歸州牧
劉焉表拜都尉為人廉正疾淫祠勅子孫惟脩善為
禱仁義為福年八十一而卒

楊充字盛國梓潼人也少好學求師遂業受古學於
扶風馬季長呂叔公南陽朱明叔潁川白仲職精究
七經其朋友則潁川荀慈明李元禮京兆羅叔景漢
陽孫子夏山陽王叔茂皆海內名士還以教授州里
常言圖緯空說去事希略疑非聖不以為教察孝廉

為郎卒

景鸞字漢伯梓潼人也少與廣漢郝伯宗蜀郡任叔
本潁川李仲渤海孟元叔遊學七州遂明經術還乃
撰禮略河洛交集風角雜書月令章句凡五十餘萬
言太守  既命為功曹察孝廉舉有道博士徵不詣
然上陳時政言經得失又戒子孫人紀之禮及遺令
期死葬不設衣衿務在節儉甚有法度卒終布衣
張壽字伯僖涪人也少給縣丞楊放家放為梁賊所
得壽求之積六十始知其生存乃賣家鹽井得三十
萬市馬五匹往贖放道為羗所劫掠盡凡往三年計

道遠不可得數乃單身詣虜涕泣自說虜哀其屢來
遣放隨還郡召為中侯詔書除巫尉以身佩印盡讓
所有財物與三弟復為郡掾章平賦役歲出三百五
十萬遷功曹吏徙五官掾卒

李餘涪人父早世兄夷殺人亡命母慎當死餘年十
三問人曰兄弟相代能免母不人曰趣得一人耳餘
乃詣吏乞代母死吏以餘年小不許餘因自死吏以
白令令哀傷言郡郡上尚書天子與以財葬圖畫府
廷

寇祺字宰朝梓潼人也與邑子侯蔓俱學涼州蔓後

為渤海王象所殺祺杖劍至象家值象病象謝曰君
子不掩人無備安有為友報讐殺病人也祺乃還久
之復往殺象由是察孝廉為灞陵令濟陰相 王晏
字叔博涪人也與廣漢張昌寧叔受業大學昌為河
南呂條所殺晏叔殺條事在叔解

李助字翁君涪人也通名方校醫術作經方頌說名
齊郭玉 以上多闕文

李仁字德賢涪人也益部多貴今文而不崇章句仁
知其不博乃游學荊州從司馬德操宋仲子受古學
以脩文自終

杜微字國輔涪人也任安弟子先主定蜀常稱聾闔
門不出建興二年丞相亮領州牧選為主簿輿而致
之亮引見與書誘勸欲使以德輔時微固辭疾篤亮
表拜諫議大夫從其所志

尹默字思潛涪人也少與李仁俱受學司馬微宋忠
等博通五經專精左氏春秋自劉歆條例鄭衆賈逵
父子陳元方服虔注說略皆誦述希復案本以左傳
授後主後主立拜諫議大夫丞相軍祭酒子宗亦為
博士耳

李譔字欽仲仁子也少受父業又講問尹默自五經
四部百家諸子伎藝筭計卜數醫術弓弩機械之巧
皆致思焉為太子中庶子右中郎將著古文周易尚
書毛詩二禮左氏注解太玄指依則賈馬異於鄭玄
與王肅初不相見而意歸多同

李福字孫德涪人也先主初為成都令建興九年遷
巴西太守後為江州都督陽武將軍入為尚書僕射
封平陽亭侯延熙初以前監軍司馬福同郡梓潼文
恭仲寶亦以才幹為牧亮治中從事丞相叅軍

季姜梓潼文氏女將作大匠廣漢王敬伯夫人也少
讀詩禮敬伯前夫人有子博女紀流二人季姜生康

稚芝女始示凡前後八子撫育恩愛親繼若一堂在
母性嚴子孫雖見官二千石猶杖之婦跪受罰於堂
歷五郡祖母隨之官後以年老不願遠鄉里姜亦常
侍養左右紀流出適分已侍婢給之博好寫書姜手
為作衣於是內門相化動行推讓博妻犍為楊進及
博子遵婦蜀郡張叔紀服姑之教皆有賢訓號之三
母堂亡義勅康稚芝婦事楊進如舅姑中外則之皆
成令德季姜年八十一卒四男棄官行服四女亦從
官舍交赴內外官冕百有餘人當時榮之王氏遂世
興

杜慈涪杜季女巴郡虞顯妻也十八適顯顯亡無子
季欲改嫁與同縣楊上慈曰受命虞氏虞氏早亡妾
之不幸當生事賢姑死就養成室存亡等但欲在終
供養亡不有恨願不易圖季知不可告而奪也乃密
謀與強逼迫之慈縊而死

敬楊涪郭孟妻楊文之女也始生失母八歲父為
盛所殺無宗親依外祖鄭行年十七適孟孟與盛有
舊盛數往來孟家敬楊涕泣謂孟曰盛凶惡薄命為
女非男比但惡讐未報未嘗一日亡也雖婦人拘制
然父子恩深恐卒狂惑益君患禍君宜踈之孟以告


盛盛不納安漢元年盛至孟家敬揚以大杖打殺盛將自殺孟止之與俱逃涪令雙勝出追聞其故而止安尉二門會赦得免中平四年涪令向遵為立圖表之

譏曰二州人士自漢及魏二百四十八人而已九十一士一人士五後賢二十人合二百六十八人以示末世之君子焉如其遺脫及後世可書者願貽後儒又春秋穀梁傳首叙曰成帝時議立三傳博士巴郡太守安獨駁左傳不祖聖人後漢時魏郡太守王牧方為三公天子詔尚書郎蜀郡張俊策之然不

行事

譏曰二州人士自漢及魏可謂衆矣何者世宗多士則相如麟遊伯司鳳翔洛下雲翳叔文龍驤在孝宣則王褒蔚炳中和作詠屬文甘泉葩為世鏡在元成則君公蹇蹇心思國病慮經劉危直忤王聽其高者則嚴君味道易俗移風仲元端委居為人宗若夫秉心塞淵與物盈冲則楊子雲也名重泰山華夏仰崇則鄭子真也不屈其身志高青雲則譙玄也不耻惡君混道推運則楊宣也降及建武明章以來出者則能內質朝揆外播五教贊和鼎味經綸治要上荅太

階下允民照處者則利居盤桓皓然玄蹈天爵翫之
人爵則咲懸車門肆夷惠齊紹若斯之倫海內服其
英名洙泗方其煥耀矣故曰漢徵八士蜀出其四又
曰漢具四義蜀選其二可謂不衆乎然巴郡胥君安
以儒學典雅稱於孝成蜀郡張俊策問尹方不出五
經常議健為呂孟有託孤之節若茲之類郡邑徃徃
垂象刊銘見有苗裔璩晚生長亂故老以沒莫所咨
質不詳其事但依漢書國志陳君所載凡士女二百
四十八人而已後賢二十人合二百六十八人以示
來世之好事者如能詳其遺脫及有可書願附于左
其傳志父祖子孫及有名失事失官位者不列寧州
人士亦不列別為目錄至晉元康末凡三百九十二
人也



Vertical text in seal script, likely a collector's or library's mark.

